

Bahan asal dari Arkib

Negara Malaysia

Hentikan ura-ura guna lambang sendiri— Pemuda

KUALA LUMPUR, Khamis — Pergerakan Pemuda UMNO Malaysia, hari ini menggesa MCA dan Gerakan menghentikan ura-ura bertanding atas simbol sendiri dalam pilihanraya umum akan datang.

Ketua Pemuda UMNO Malaysia, yang juga Timbalan Menteri Pelajaran, Datuk Haji Suhaimi Datuk Haji Kamaruddin menegaskan dalam satu kenyataan, pihaknya tidak sekali-kali menyetujui ura-ura tersebut.

“Pergerakan Pemuda UMNO Malaysia sama sekali tidak menyetujui hasrat mana-mana parti komponen Barisan Nasional (BN) menggunakan simbol sendiri, melainkan di Sabah, kerana akan merugikan BN.

“Ahli-ahli UMNO, khususnya Pemuda, yang telah siap sedia dengan jentera pilihanraya, menghadapi kesulitan menentukan calon yang wajar disokong sekiranya komponen BN dibenarkan bertanding menggunakan lambang sendiri.

“Demi kepentingan BN, Pergerakan Pemuda UMNO meminta supaya parti-parti berkenaan menghentikan cadangan menggunakan simbol sendiri, kecuali di Sabah,” katanya.

MCA telah mencabar Gerakan supaya bertanding atas lambang sendiri dalam pilihanraya umum akan datang sekiranya pembahagian kerusi pilihanraya tidak dijalankan secara adil.

Bagaimanapun, Setiausaha Agung Pemuda MCA Kebangsaan, Encik Chew Hock Thye menegaskan semalam, usaha bertanding atas simbol sendiri adalah bertentangan dengan konsep dan falsafah BN.

Perkara itu juga disifatkannya sebagai satu cabaran terhadap perpaduan BN keseluruhannya.